



La lungje storie de Euskal Selekzioa, la naziônâl dai bascs



Euskal Selekzioa al è il non che, dal 2009 indenant, si à dade la squadre che e met adun i zuiadòrs di balon de comunitât naziônâl basche. Tes sôs filis, di fat, a zuin atletis che a rivin di dute Euskal Herria (la tiere là che si fevele par euskara, o sei par basc, la lenghe plui antighe de Europe), ven a di de Comunitât Autonome Basche e de Navare, che si cjatin intal stât spagnùl, e dal País Basc setentrionâl cjapât dentri tal stât francès. Lis lidris di cheste squadre però a àn sù par jù un secul di storie. Cuant che tal 1913 e ven fondade la Federazion spagnole di balon si metin sù ancje cuatri federazions teritoriâls che, in plui di inmaneâ i campionâts locâi, a proviodin a formâ des rappresentativis "regionâls". La rappresentative de Federazion dal Nord, che e

met adun Provinciis Baschis e Cantabrie, e zuie la sò prime partide tal Zenâr dal 1915 cuintri de Catalogne. Cheste selezion però e je formade dispès dome di zuiadòrs bascs e par chest, cul non di Vasconia, e devente la prime rappresentative basche. Dopo di cualchi an tribulât là che la compositon teritoriâl de Federazion dal Nord e mude dal continui, tal 1922 si met sù l'Equipo Vasco, protagonist di une tournée internaziônâl tra Argentine, Uruguay e Brasil. Tai prins agns '30 si torne al non Vasconia. A segnâ la storie de selezion basche però a son massime i agns de vuere civil. Tal 1937, cuant che il guvier autonom basc che al combat cul front republican cuintri dai golpiscj voidâts di Francisco Franco si cjate za tune situazion critiche, si decît di meti sù la

Euzkadiko Selekzioa par tignî vive la cause basche e republicane sul plan internaziônâl e par tirâ sù fonts par judâ i fruts vuarfins o sfolâts par vie de vuere. La selezion basche e je formade



di zuiadòrs innomenâts ancje a nivel internaziônâl tant che il portir Gregorio Blasco, il centricjampist Leonardo Zilaurren e i atacants Luis Regueiro, Isidro Langara e Guillermo Gorostiza. Tra milante dificoltàs, jenfri l'Avrîl dal 1937 e il Jugn dal 1939, la Euzkadiko Selekzioa e zuie desenis di partidis tra France, Cecoslovachie, Polonie, Union Sovietiche, Norvegie, Danimarcje, Cuba, Cile e Messic frontant (e dispès batint) sei scuadris di club che rappresentativis statâls.

A man a man che i destins de vuere a van in piês pal front republican a cresin ancje i pidiments pe Selekzioa, a tacâ de menace di sanzions de bande de FIFA pes scuadris che a vessin di zuiâ cuintri de rappresentative basche. Chel istès la Selekzioa e va indenant e, cul non di Club Deportivo Euzkadi, si cjatarà fintremai a partecipâ ae stagion 1938/1939 de Liga Mayor messicane. Ta chest pais si zuie ancje la ultime partide de formazion basche: o sin ai 18 di Jugn dal 1939. Un pâr di mès plui tart, cu la vuere aromai finide, il president dal guvier basc in esili al decît di siera la esperience de squadre. La plui part dai siei membrs però e continuerà a zuiâ di balon cun scuadris di club de Americhe centrâl e meridionâl.

Dopo de muart di Franco, a cjaval tra il 1978 e il 1980, une Selekzioa dute gnove si cjate a frontâ prime une selezion irlandese e po Bulgarie e Ongja-

rie cun chê di tirâ sù fonts par finanziativis a pro de lenghe basche. Al è però cui agns '90 dal secul stât che lis ativitàs de Selekzioa a tornin a cjapâ une cier-te continuitât cun partidis cuintri

des rappresentativis di stâts tant che Romania, Bolivie, Russie, Paraguay, Estonie, Uruguay, Nigirie e v.i.

Tai ultins agns lis ativitàs de Selekzioa a àn pontât massime a otignî il ricognossiment uficiâl de bande di FIFA e UEFA. Il regolamento de FIFA al previôt che par partecipâ a competizioni internaziônâls uficiâls si vedi di rapresentâ un stât indipendent o di vê une autorizazion esplicite de proprie federazion statâl.

Di scuadris che a rapresentin comunitâts che no son ancjemò indipendentis a 'nd è za diversis (baste pensâ, par esempi, a Scozie, Gales o aes isulis Føroyar), il probleme vèr al sta duncje te oposizion plui total de bande des autoritâts spagnolis a concedi cualsisei ricognossiment ai bascs. La pôre, cun di fat, e je che la indipendence sul plan sportîf e judi po ancje chê sul plan politic. Chel istès, cu la poie di cetantis realtâts associativis e di une grande part de popolazion basche, la bataie de Selekzioa e va indenant. Nol è un câs che, ancje par basc, uficialitât (ofizialtasuna) al fasi rime cun libertât (askatasuna).

Carli Pup

Par cure di:

